

四庫全書

集部

欽定四庫全書

集部
宛陵集
目錄
卷二

詳校官庶吉士

臣張濤

檢討臣何思鈞覆勘

覆校官博士

臣劉光第

校對官主簿

臣汪日贊

謄錄舉人

臣曹夢齡

欽定四庫全書

集部三

宛陵集目錄

別集類二
宋

卷一

西京詩五十六首

卷二

西京詩五十首

卷三

西京詩六十一首

卷四

池州後詩五十八首

卷五

池州後詩上二十八首

池州後詩下三十三首

卷六

池州後詩三十七首

汝州後詩十一首

卷七

汝州後詩五十一首

卷八

汝州後詩四十三首

湖州後詩六首

卷九

湖州後詩四十六首

卷十

湖州後詩六十五首

卷十一

湖州後詩五十九首

卷十二

詩六十三首

卷十三

詩二十九首

卷十四

詩十六首

卷十五

詩四十六首

卷十六

詩四十四首

卷十七

詩六十四首

卷十八

詩四十六首

卷十九

詩三十五首

卷二十

詩五十二首

卷二十一

詩四十四首

卷二十二

詩四十三首

卷二十三

詩四十二首

卷二十四

詩五十九首

卷二十五

詩四十四首

卷二十六

欽定四庫全書

宛陵集
目錄

詩四十七首

卷二十七

詩四十四首

卷二十八

詩五十八首

卷二十九

詩五十首

卷三十

詩五十六首

卷三十一

詩五十七首

附記一首賦一首

卷三十二

詩六十一首

卷三十三

詩五十四首

卷三十四

詩六十四首

卷三十五

詩三十七首

卷三十六

詩五十二首

卷三十七

詩六十首

卷三十八

詩四十七首

卷三十九

詩二十七首

卷四十

詩四十五首

卷四十一

詩四十首

卷四十二



詩三十八首

卷四十三

詩六十三首

卷四十四

詩三十八首

卷四十五

詩三十七首

卷四十六

詩三十二首

卷四十七

詩五十二首

卷四十八

詩四十二首

卷四十九

詩二十八首

卷五十

詩二十九首

卷五十一

詩五十首

卷五十二

詩三十七首

卷五十三

詩三十二首

卷五十四

詩三十三首

卷五十五

詩三十四首

卷五十六

詩二十九首

卷五十七

詩三十首

卷五十八

詩三十四首

卷五十九

詩三十四首

卷六十

記一首

序一首

賦十九首

臣等謹案宛陵集六十卷附錄一卷宋梅堯

臣撰堯臣字聖俞宣城人官屯田都官員外郎其詩初為謝景初所輯僅十卷歐陽修得其遺藁增併之亦止十五卷其增至五十九卷又他文賦一卷未詳何人所編陳振孫謂即景初舊本修為作序者殆未詳考修序文耳通考載正集六十卷外有外集十卷此為明姜奇芳所刊卷數與通考合惟無外集祇有補遺三篇及贈答詩文墓誌一卷亦不知

何人所附陳振孫謂外集多與正集復出或
後人刪汰重複故所錄者止此耶宋初詩文
尚沿唐末五代之習柳開穆修欲變文體王
禹偁欲變詩體皆力有未逮歐陽修崛起為
雄力復古格其時曾鞏蘇軾蘇轍陳師道黃
庭堅等皆尚未顯其佐修以變文體者尹洙
佐修以變詩體者則堯臣也其詩旨趣古淡
惟修深賞之邵博聞見後錄載傳聞之說謂

修忌堯臣出已上每商推其詩多故刪其最
佳者其誕妄甚矣乾隆四十一年十二月恭

校上

總纂官臣紀昀臣陸錫熊臣孫士毅

總校官臣陸費墀

欽定四庫全書

目錄

原序

予聞世謂詩人少達而多窮夫豈然哉蓋世所傳詩者多出於古窮人之辭也凡士之蘊其所有而不得施於世者多喜自放於山巔水涯之外見蟲魚草木風雲鳥獸之狀類往往探其竒怪內有憂思感憤之鬱積其興於怨刺以道羈臣寡婦之所歎而寫人情之難言蓋愈窮則愈工然則非詩之能窮人殆窮者而後工也予友梅聖俞少以廕補為吏累舉進士抑於有司困於州縣

凡十餘年年今五十猶從辟書爲人之佐鬱其所畜不
得奮見於事業其家宛陵幼習於詩自爲童子出語已
驚其長老既長學乎六經仁義之說其爲文章簡古純
粹不求苟合於世世之人徒知其詩而已然時無賢愚
語詩者必求之聖俞聖俞亦自以其不得志者樂於詩
而發之故其平生所作於詩尤多世既知之矣而未有
薦於上者昔王文康公嘗見而歎曰二百年無此作矣
雖知之深亦不果薦也若使其幸得用於朝廷作為雅

頌以詠歌大宋之功德薦之清廟而追商周魯頌之作
者豈不偉歟奈何使其老不得志而爲窮者之詩廼徒
發於蟲魚物類羈愁感歎之言世徒喜其工不知其窮
之久而將老也可不惜哉聖俞詩既多不自收拾其妻
之兄子謝景初懼其多而易失也取其自洛陽至於吳
興以來所作次爲六十卷子嘗嗜聖俞詩而患不能盡
得之遽喜謝氏之能次也輒序而藏之慶厯六年三月
右正言知制誥知滁州事歐陽修序

欽定四庫全書

序

欽定四庫全書

宛陵集卷一

宋 梅堯臣 撰

和謝希深會聖宮

三后威靈遠層巒棟宇興衣冠漢原廟歌舞魏西陵日
月融光盛山河王氣增叢楹琢文石連網絡朱繩碧瓦
寒鋪玉重欄瑩鏤冰粹儀神霧擁法袞繡龍升星斗羅
容衛軒墀侍股肱宸蹤耀璇牖瑞羽集觚稜閔殿深珠
箔雕垣界綺塋笙從緱嶺咽雲倚帝鄉凝龜組恭來詣

貂璫肅奉承欲知歸厚意孝德自烝烝

右丞李相公自洛移鎮河陽

侯服齊三輔天臺聳百僚
新章刻銅虎舊德冠金貂
已作歌襦化方期執玉朝
雙韃辭洛宅千騎向河橋
鼓角春城暮鶯花故苑遙
瓜亭猶接畛棠茇自敷條
夾道都人擁迎風駟牡驕
莫隨文學乘空望旆旌飄

上巳日午橋石瀨中得雙鰕魚

脩禊洛之濱湍流得素鱗
多慙折腰吏來作食魚人
水

髮黏膏綠溪毛映渚春風沙暫時遠紫線憶江蓴

寒食前一日陪希深遠遊大字院

一百五將近千門煙火微閑過少傅宅喜見老萊衣晚
雨竹間霽春禽花上飛禪庭清溜滿幽興自忘歸

遊龍門自潛溪過寶應精舍

遙愛夏景佳行行清興屬安知轉迴溪始覺來平谷古
殿藏竹間香菴遍巖曲雲霞弄霽暉草樹含新綠時鳥
自繇蠻山花競紛縹莫言歸路賒明月還相續

依韻和希深遊大字院

白傳舊宅

夫君康樂裔顧我子真派湛然懷清機超爾尋虛界暫
來香園中共憩寒松大先生醉復吟長老言不壞信與
賞心符寧同俗士愛杖屨恣遊遨池塘仍感慨焚香露
蓮泣聞磬霜鷗邁青板今已空濁醪誰許載軟草當熊
網低簷挂纓帶不覺月明歸候門僮僕怪

傷白雞

我庭有素雞翎羽白如脂日所慮狂犬未嘗憂孽狸暝

棲向檐隙朝啄循階基每先烏鳥鳴不失風雨時雖吾
困廩薄尚汝稻梁遺昨宵天氣黑陰物恣所窺潛來銜
搏去但覺聲音悲開門俾馳救已過牆東陲呵叱不敢
食奪然留在茲湧血被其頸喙呷氣甚危皓臆變丹赤
霜翅兩離披憫心欲之活碎腦安能治委瘞從爾命孰
忍薑桂爲猶看零落毛蕩漾隨風吹念始託茲地蒙幸
信可知充庖豈云患度日無苦飢如何遇凶獸毒汝曾
不疑斯事義雖小得以深理推鄧生賜山鑄未免終餒

而人道尚乃爾愴焉聊俛睂

尹師魯治第伐樗

伊人利營構思欲新其居匠築經舊址檐楹礙高樗且
云忍不伐何以成吾廬人言此樹古百怪所憑依獨秉
一定議自將群俗違乃俾執柯者丁丁霜刃揮殲殞條
百尺橫仆株數圍從茲朝夕間不聞鳥雀喧既能考子
室而復高其門周也昔騁辯得以不材論工今誠匪度
苟害安可存舟楫且非藉新爨聊用燔莫比溝中斷區

區望攝樽

尹陽尉耿傳惠新栗

金行氣已勁霜實縣林梢尺素走下隸一奩來遠郊中
黃比玉質外刺同芡苞野人寒齋會山爐夜火炮梨慚
小兒嗜茗憶麤官拋此馬真可貺遽爾及衡茅

和楊子聰會董尉家

董生方好雅茲日為埽扉森爾延嘉賓歡然去塵機有
客振雙袂敢言陽春暉聊停玉麈尾爲歌金縷衣古辭

何稠疊無乃惜芳菲
三閭不餽糟二子自採薇
雖留千載清未免當時飢
吾愛曹公詩古來不敢非
人生若朝露捨醉當何歸
四座驚此語未厭翠觴飛
胡能後天地何可恃輕肥
沉酣且長詠白首空歔歔

嶺雲

片雨過青天山雲歸絕嶺
林際隱微虹溪中落行影
還省隴首飛復愛山間靜

垂澗藤

寒松偃澗濱弱蔓垂纓綠波縈翠帶長水濺低花馥終
日採蘋人攀條映巖曲

林翠

鬱鬱長條抽林間翠堪翦背嶺山氣濃幽人趣不淺

舟中遇雪

曉風鳴大澤春雪下長河沙草綠堤沒楊花拂水多驚
鷗不知遠候鴈幾聞過欲問邪溪轉今朝奈興何

田家

四時

昨夜春雷作荷鋤理南陂杏花將及候農事不可遲蠶
女亦自念牧童仍我隨田中逢老父荷杖獨熙熙

草木遶籬盛田園向郭斜去鋤南山豆歸灌東園瓜白
水照茅屋清風生稻花前陂日已晚聒聒競鳴蛙

荒邨人自樂頗足平生心朝飯露葵熟夜春雲谷深採
山持野斧射鳥入煙林誰見秋成事哀蟬復怨砧

今朝田事畢野老立門前拊頸望飛鳥負暄話餘年自
從備丁壯及此常苦煎卒歲豈堪念鶉衣著更穿

塗中遇雪寄希深

方爲郡邑吏日與故人違極目千山碧馳心一鳥飛岸
傍邨杳杳波上雪霏霏欲寄洛陽信汴流行客稀

妄薄命

昔是波底沙今爲陌上塵曾聞清冷混金屑誰謂飄揚
逐路人悠悠萬物難自保朝有穠華暮衰老須知鉛黛
不足論何必芳心競春草草有再三榮顏無一定好曩
恩寧重持徒能亂懷抱

秋日同希深昆仲遊龍門香山晚泛伊川觴詠
久之席上各賦古詩以極一時之娛

落日川上好徘徊弄孤舟鳴榔進山口清唱發渡頭淺
瀨不可泝停橈信中流山樽對蒼翠溪鳥自沉浮濯足
破嵐影米淩臨芳洲千龕晚煙寂雙壁紅樹秋細細石
間泉搖搖波際樓澄潭若瀉鑑萬象已盈眸康樂足清
尚惠連仍此遊摘景固無遺揮筆曾未休醉來同淵明
興盡殊子猷歸傍漁梁靜行看夜火幽露華初滴滴夜

吹何颼颼不犯嚴城漏誰言憐近邱

依韻和希深雨後見過小池

碧池新雨後清興一何賒有客過顏巷無貧似阮家白
醪聊泛蟻黃菊未開花既至休辭醉君其奈歲華

依韻和子聰夜雨

窗頭光更迴宿霧晦層檐寒氣微生席輕風欲度簾濕
螢依草沒暗溜想池添況值相如渴無嫌魯酒甜

和趙員外良佐趙韓王故宅

開國勲庸大重城邸第寬枯楊映樓角蔓草被牆端不
見分香妾空餘鬪鴨闌誰來悲孔雀金翠羽毛殘

春日遊龍門山寺

還邀二三子共到鑿龍遊陰壑泉初動春巖氣欲浮竹
藏深崦寺人渡晚川舟始覺山風急歸鞍不自留

依韻和希深遊府學

東府尊儒日中州進學初牲牢奠商後典籍講秦餘大
法存無外群英樂自如時慙遊聖末來駕折轅車

傷桑

柔條初變綠春野忽飛霜田婦搔蓬首水蠶絕繭腸名
翬依麥畦戴勝繞枝翔不見羅敷騎金鈎自挂牆

觀理稼

稂莠日已長恩恩艾薶初來時露霑屨歸去月侵鉏一
腹餒猶甚百骸勤有餘吾無力畊苦謬讀古人書

新繭

露柘林初靜煙梯不復收春蠶吐絲足工女忌寒休翠

薄時方獻清泉緒未抽閨中能自巧繡作玉釵頭

依韻和希深遊樂園懷主人登封令

竹映紅蕖水榭開門閒乳雀下青苔伊人何戀五斗粟
不作淵明歸去來

錦竹

此草也似
竹而斑

雖作湘竹紋還非楚筠質化龍徒有期待鳳曾無實本
與凡草俱偶親君子室

廢井

湮廢不知年石欄蒼蘚澀渴心空自煩長綆曾誰汲無
復語滄波坎蛙奚所及

茶竈

山寺碧溪頭幽人綠巖畔夜火竹聲乾春甌茗花亂茲
無雅趣兼新桂煩然爨

緱山子晉祠

以下陪太尉錢相
公遊嵩山七章

王子居玉京故山空寂寞猶聞邈月笙尚想賓天鶴翠
柏深古壇丹霞留迴壑芝庭誰欸扉旌旗穿林薄

少林寺

紅旌過翠岑林際瞻蓮宇門對幾千巖
花開第一祖禪庭松色寒石室苔痕古
寂寂不逢人空檐燕方乳

少姨廟

靈祠古殿深少室群峰碧行雨欲隨車
望巖非化石常聞蘭氣蒸誰奠椒香液
寄謝洛川妃凌波定何益

天封觀

車馬雲外來衣霑半山雨弭節叩真居
捫蘿笑塵垢迴

溪響石叢靈茹抽巖塢玉檻刻年華應無媿前古

殿檻石柱

上有唐樊宗師石鴻韓退之盧全題名在焉今亦刻名於此

會善寺

杳謁隨龍節縈紆歷寶山琉璃開淨界薜荔啟禪關
煮茗石泉上清吟雲壑間峰端生片雨稍促畫輪還

啟母石

曠哉蒿室陽神怪所棲宅蒼石不知年靈熊去無迹煙
巖想桂宮苔壁疑椒掖不學舜娥悲瀟湘竹枝碧

輾轅道

險絕稱漢關晨躋瞻一室盤紆石路迴迤邐雲峰出古
壁挂青蒼天風起蕭瑟洛城西首時望望平煙密

中伏日陪二通判妙覺寺避暑

時有僧鼓琴於座上

紺宇迎涼日方牀御綌清談停玉麈雅曲弄金徽高
樹秋聲早長廊暑氣微不須河朔飲煮茗自忘歸

元政上人遊終南

雄節居杜陵南山常在目今茲羨行遊因以謝巖谷環

錫恣探勝搜碁方踐陸五門嵐翠橫人水秋陰覆雲峰
多隱見林嶺乍回復若見採芝人余非戀微祿

寄河陽僉判富彥國

籍籍名方遠人知第一流翻同貴公子來事外諸侯地
險長河急天高畫角秋仲宣應自樂寧復賦登樓

河南受代前一日希深示詩

我昔在桐鄉伊人頗欣戴今來佐洛南事事爲時背自
媿居下流無能謝前輩固乏橫草功當蒙及瓜代且遺

牒訴還何用吏民愛洗眼看舊書怡然忘宇內

秋雨

雨後秋氣早涼歸室廬清既推蚊蠅勢任壯蛩蟬聲石
榴墜枝熟蒼蘚緣階生閉門且高卧畏肉泥塗行

白雲和子聰

長憶江海間龍鳴向寒水藹藹蒼渚空悠悠白雲起是
時在漁舟放溜看未已今來居洛陽埃壘生蹄軌羨君
茲日心怡悵聊徙倚

同尹子漸王幾道訪郭三別墅不遇

秋野已澄曠偶來幽興多
次居隔寒水柴戶陰喬柯
竹曾留鳳攜朋不爲鶩人
歸碧苔徑應識履痕過

水荇

灼灼有芳豔本生江漢濱
臨風輕笑久隔浦澹妝新
白鷺煙中客紅蕖水上鄰
無香結珠穗秋露浥羅巾

黃河

積石導淵源汙汙瀉崑閬
龍門自吞險鯨海終涵量
怒

狀生萬渦驚流非一狀淺深殊可測激射無時壯常苦
事隄防何曾息波浪川氣迷遠山沙痕落秋漲槎沫夜
浮光舟人朝發唱洪梁畫鷁連古戍蒼崖向浴鳥不知
清夕陽空在望誰當大雪天走馬堅冰上

王氏昆仲歸寧

昨夜雪霏霏梁山吟未歸關河誰道遠鴻鴈自相依落
日人煙少寒雲驛路微共將彭澤酒稱壽向庭闈

予聰惠書備言行路及遊王屋物趣因以荅

自我河橋來清話殊未已亟言閱通疇晨駕遂遵彼尺
書忽見遺經由皆可紀草草始辭家怱怱渡河水前邨
客心速入暮陰風起脩路隘且長疲驂未能止茅居聒
夜春寒犬吠墟里明發西北行岡巒踰迤邐叢蓊但蒙
密未見山中美谷開逢邑閭豈謂連都鄙冠帶一二同
麇麇左右比問予奚所之俛眉聊啟齒暫往登天壇煙
雲隨步趾傍臨日觀低却望嵩邱邇屑屑視塵埃紛紛
若螻蟻便有林壑心期將榮宦委我昔愛青蒼無時常

徙倚今朝羨君遊勝事空聳企徒嗟黃綬身莫接青霞
軌安得憑羽翰幽懷寄如此

環州通判張殿丞

亢

欲向蕭關外窮陰雪暗沙磧寒鴻鴈少冰合水泉賒自
有從軍樂應無去國嗟春風曾不到吹角寄梅花

張太素之邠幕

應幕向幽郊晨裝辭邾鄆長亭欲少留飛鵠初成曲魯
酒上離筵行塵生驥足悠悠關戍遙黯黯煙雲屬塞邑

多苦寒國風遺舊俗寄音文讌餘莫待霜條綠

孫屯田召爲御史

薦牘交車府恩書下建章輕軒辭瑞翟危弁學神羊祖
酌方滋桂行威欲犯霜鳳毛仍襲慶雞舌更含香氣鬱
翔龍闕風清振鷺行今朝洛民思東陌盛壺漿

與諸友普明院亭納涼分題

岸幘清涼地翛然樂未窮竹陰過晚雨林表見殘虹花
影平波上經聲小隄東還思醉吟者寧與此時同

梅花

似畏群芳妒先春發故林曾無鶯蝶戀空被雪霜侵不
道東風遠應悲上苑深南枝已零落羌笛寄餘音

依韻和希深立春後祀風伯雨師畢過千橋莊
青郊誰駐馬謝客思池塘野水微波綠江梅嫩蕊黃初
從莫風雨遂此樂壺觴已愛幽禽語園林即日芳

尹子漸歸華座伏苓若人形者賦以贈行

因歸話伏苓久著桐君籍成形得人物具體存標格神

岳畜粹和寒松化膏液外凝石稜紕內蘊瓊腴白千載
忽旦暮一朝成琥珀既瑩毫芒分不與蚊蚋隔拾芥曾
未難為器期增飾至珍行處稀美價定多益

初見杏花

不待春風遍煙林獨早開淺紅欺醉粉肯信有江梅

宛陵集卷一

欽定四庫全書

宛陵集卷二

宋 梅堯臣 撰

依韻和載陽登廣福寺閣

過聞聯騎出登覽思逾清曉漲林煙重春歸野水平始
看仙杏發已愛袂衣輕誰見吟餘處殘陽上古城

依韻和歐陽永叔同遊近郊

洛水橋邊春已迴柳條蔥蒨眼初開無人拾翠過幽渚
有客尋芳上古臺林邃珍禽時一轉酒酣紅日未西顏

知君最是憐風物更約偷閑取次來

依韻和永叔同遊上林院後亭見櫻桃花悉已

披謝

去年君到見春遲今日尋芳是夙期
祗道朱櫻纔美蕊及來幽圃已殘枝
飄英尚有遊蜂戀著子唯應谷鳥知
把酒聊能慰餘景乘歡不厭夕陽時

依韻和王幾道塗次杏花有感

馬上逢丹杏芳條拂眼過可憐荒徑少
不道故園多豔

萼粘紅蠟仙葩縐薄羅客心知易感路遠奈愁何

遊園晚歸馬上希深命賦

興盡夕陽天言歸躍杏鶯新陰六街樹遠目萬家煙歌
咽樓千尺吟餘月一弦花間有遊妓醉去墮金鈿

留題希深美檜亭

幽深有佳趣曾不減林泉衆綠經新雨殘紅墮夕煙栽
萱北堂近夢草故池連乘月時來往清歌思浩然

留守相公新勑雙桂樓

藻棟起霄間芳條俯可攀
晚雲談次改高鳥坐中還
日映城邊樹虹明雨外山
唯應謝池月來照衮衣間

和希深避暑香山寺

有客乘新霽雲林共扣扃
輕舟過下渡遠水漲前汀
原隰含幽藹岑嵐入杳冥
誰知得深趣履齒石苔青

和希深晚泛伊川

放溜下平波舟移不知遠
稍回溪口風恣愛雲中巘
水鳥靜相依蘆洲藹將晚
歸路莫言餘何妨乘月返

路中月夕登霽景臺與唐英話別

風枝不動月光干
況是高臺過新雨
吳客方思千里歸
不負洛陽塵與土
到時水落鰕鱸肥
香稻初炊鱸紅縷
休言羊酪敵蓴羹
我亦長行念東楚
平明馬嘶誰可留
去去相望富春渚

張侍郎中隱堂

疇昔人歸老於茲
望白雲門高知後
慶賓至誦先芬
草樹中國秀衣冠
舊里聞寧同江令
宅寂寞向淮濱

太尉相公中伏日池亭宴會

得山字

何言避徂暑清宴水軒閑竹氣陰池鳳雲峰照衮山玳
簪方映座綵服亦承顏樂奏寒波上杯香綠艾間瓜浮
五色爛簾卷半鉤彎今日賓裾盛袞劉豈足攀

送臧尉

藹藹神仙尉西風躍馬歸離群賦黃鵠拜慶著斑衣雨
氣連關黑槐花上路飛同為洛陽客今日故人稀

新秋普明院竹林小飲詩序

余將北歸河陽友人歐陽永叔與二三君具觴豆選勝
絕欲極一日之歡以爲別於是得普明精廬醺酒竹林
間少長環席去獻酬之禮而上不失容下不及亂和然
嘯歌趣逸天外酒既酣永叔曰今日之樂無媿於古昔
乘美景遠塵俗開口道心胸間達則達矣於文則未也
命取紙寫普賢佳句置坐上各探一句字字爲韻以誌
茲會之美咸曰永叔言是不爾後人將以吾輩爲酒肉
狂人乎頃刻衆詩皆就乃索大白盡醉而去明日第其

篇請余爲叙云

得高樹早涼歸

翻然思何苦昨夜秋風高良友念將別幅巾邀此邀清
梵隔寒流亂蟬鳴古樹誰知林下遊復得杯中趣池上
暑風收竹間秋氣早回塘莫苦留已變王孫草未墜高
梧葉初生玉井涼愁心異潘岳獨自向河陽不減阮家
會所嗟當北歸厭厭敢辭醉明發此歡非

新秋雨夜西齋文會

夜色際陰霾燈青謝客齋梧桐生靜思絡緯動秋懷小
酌寧辭醉清言不厭諧誰憐何水部吟苦怨空階

秋陰

已過蕭蕭雨猶成黯黯陰登臨潘岳思慘慄楚臣心遠
吹鳴高樹低雲冒晚岑久爲關外客不忍聽疎砧

雨中移竹

荷鋪冒秋霖怱怱移翠竹欲分溪上陰聊助池邊綠中
散林未開子猷心已足青青謝栽培豈媿凡草木

希深所居官舍新得府相疏圃以廣西園

楚相拔葵後蕭條三畝餘煙畦偶連畛蕙圃得增墟便
欲開春沼何妨薶野蔬始添臺榭美況近子雲居

和永叔柘枝歌

留守相公
南莊按舞

漁陽三疊音隆隆紅蕖亂坼當秋風披香擁霧出妖嫵
嫵眉壯髮翩驚鴻鏘鏘雜珮離芳渚珠帽紅韉振金縷
相迎垂手勢如傾障被倚歌詞欲吐最憐應節乍低昂
便轉疾徐皆可覩飄揚初認雪迴風躑躅還看繭紫緒

小小寧聞怨曲長盈盈自解依依儔侶藝奇體妙按者誰
金貂大尹宴清池綺茵繡幄粲輝映玳簪珠履何委蛇
是時郊原新退暑天清氣爽過林墅淮王載酒昔嘗聞
謝公攜妓那能數始知事簡樂民和不厭來觀柘枝舞

依韻和載陽郊外

近隰蔥蘢曙驚鳥睥睨啼日光林杪動吹騎管中嘶路
遶寒原古煙橫遠戍迷今來異賓孟誰復歎雄雞

奉和永叔得辛判官伊陽所寄山桂數本封殖

之後遂成雅韻以見貺

團團綠桂叢本自幽巖得惠好知不忘青蔥寧改色香
生蓮幕間花白萱堂側月露夜偏滋瓊枝相翕赫

河陽秋夕夢與永叔遊嵩避雨於峻極院賦詩
及覺猶能憶記俄而僕夫自洛來云永叔諸君
陪希深祠岳因足成短韻

夕寢北窗下青山夢與尋相歡不異昔勝事却疑今風
雨幽林靜雲煙古寺深

此二句夢中得

攬衣方有感還喜問來

音

希深惠書言與師魯永叔子聰幾道遊嵩因誦
而韻之

聞君奉宸詔瑞祝疑靈岫山水聊得游志願庶可就豈
無朋從俱況此一二秀方蘄建春陌十刻殘晝漏初經
緱氏嶺古柏尚鬱茂却過轆轤關巨石相撐闢夕齋禮
神祠法袞被藻繡畢事登山椒常服更短後從者十數
人輕齋不爲陋是時天清陰力氣勇奔驟雲巖杳虧蔽

花草藏澗竇傍林有珍禽驚聒若避殼盤石暫憩休泓
泉助吞漱上窺玉女窗嶄絕非可構下玩擣衣碓煨燿
金紋透尹子體雄恢攀緣逾習狃歐陽稱壯齡疲軟屢
顛踣競歡相扶持芒屨資踐蹂八仙存故壇三醉孰云
謬鄙哉封祝碑數子昔鐫鏤偶記一時事曷虞來者詬
絕頂瞰諸峰隘然輕宇宙遙思謝塵煩欲知群鳥獸韓
公傳石室聞之固已舊當時興稍衰不暇苦尋究東崖
暗壑中釋子持經呪于今二十年飲食同猿狖君子聆

法音充爾溢膚腠嘗期躡屐過吾儕色先愀叶遂乖真
諦言茲亦甘自咎中頂會幾望涼蟾皓如畫紛紛坐談
謔草草具觴豆清露濕巾裳誰人苦羸瘦便即忘形骸
胡爲戀纓綬或疑桂宮近斯語豈狂贅歸來遊少室峭
崿殊引脰石室迢遞過採訪仍邂逅捫蘿上岑邃仙屋
何廣袤乳水出其間涓涓自成溜凡骨此熏蒸靈真安
可覩霞壁幾千尋四字侔篆籀咸意苔蘚文誠爲造化
授標之神清洞民俗未嘗邁忽覺風雨冥無能久瞻扣

怱怱遂宵征勝事皆可復
俚歌縱喧譁怪說多駁糅
凌晨關塞陽追賞顏非厚
窮極四百里寧憚疲左右
昨朝書報予聞甚醉醇
耐所嗟遊遠方心焉倍如疚

送河清賈主簿歸任

不遠水雲間悠悠沂鷗還
分亭接雞犬舉酒對河山
殘雪依荒磧寒煙入暝灣
昔人鸞枳歎一并在離顏

依韻和永叔雪後見寄兼云自尹家兄弟及幾
道散後子聰下縣久不得歸頗有離索之歎

常欲登芒嶺無由見洛橋雪飛關戍迴人憶剡溪遙廣
隰嘶征鴈長河起怒飈遽言歡友散能使去魂銷晚日
窮幽謁愁雲暝沈寥縱令佳約在載酒定何邀

依韻和歐陽永叔黃河八韻

少本江南客今爲河曲遊歲時憂漾溢日夕見奔流齧
岸侵民壤飄槎閣鴈洲峻門波作箭古郡鐵爲牛目極
高飛鳥身輕不及舟寒水孤自聽源水使嘗求密樹隨
灣轉長曾刮浪收如何貴沉玉川興是諸侯

李父知并州

捧詔出明光飛軒陟太行玉墀分近侍虎綬給新章
笳吹喧行陌旌旗卷夜霜鴈歸汾水綠城壓代雲黃
土屋春風峭羶裘牧騎狂關山寧久駐剩宴柳溪傍

河陰中寨寒食

擊柝聲初絕爲魚夢已殘幽禽哢清曉宿雨度餘寒
爨火明千竈風旗展一竿歸心慙社燕自歎此微官

再至洛中寒食

西洛逢寒食依依似昔年千門方禁火九野自生煙飄
泊梨花雨追隨杏葉鶻遊人莫惜醉風景滿伊川

同永叔子聰遊嵩山賦十二題

公路澗

我來袁公溪斷岸猶殘壘僵柳遠臨灣新蒲初出水行
行古臺近兩兩驚禽起雞犬何處聞人家深塢裏

拜馬澗

王子昔凌霓國人茲拜馬依稀日夜笙聲入寒泉瀉空

傳七日期飛鶴何時下

二室道

度嶺失群山千峰出天際方欣左右看屢改繁迴勢勝
事誰與同芬然有蘭蕙

自峻極中院步登太室中峰

稅駕綠巖前攀蘿不知倦人從樹杪來路向雲端轉忽
覺在煙霓回看峰嶺變

玉女窗

玉洞倚霞壁，天窗露微明。
驂鸞去不返，啼鳥空相驚。
萬木自虧蔽，捫蘿復誰情。

玉女擣衣石

幽石稱擣衣，擣衣人不見。
雲纓白飄飄，巖樹長蔥蒨。
猶應寒夜中山月，來鋪練。

天門

古壁何蒼蒼，穿雲玉梯出。
歛然起青冥，却立觀少室。
前巖復後峰，陰晴狀非一。

天門泉

泠泠雲外泉的的巖光入靜若仙鑑開寒疑玉龍蟄時
應下鹿群迹印青苔濕

天池

安知最高頂清淺水池開有時片雲出倏忽生風雷誰
羨雙黃鵠刷羽來徘徊

三醉石

相期物外遊共醉仙壇石舉手薄高穹清風生兩腋都

忘塵世煩笑傲聊爲適

登太室中峰

日夕望蒼崖嶄嶄在天外及來步其巔下見河如帶半
壁雲霧昏山根已霽霈

峻極寺

山高路已窮條爾逢蘭若落日老僧閑支頤古松下緩
步入禪庭苔蒼蒼但蕭灑

擬玉臺體七首

欲眠

鴛鴦羅薦開翡翠香幃寂解帶竟羞明移燈向東壁

攜手曲

攜手出中閨殷勤尅密期密期雖不遠迴顧步遲遲

雨中歸

來時雲冉冉去值雨霏霏莫怪羅衣濕荆王夢罷歸

別後

昨日日暮別今日日暮愁猶認縱橫色依依在石榴

夜夜曲

情來不自理
明月生南樓
坐感昔時樂
翻成此夜愁

落日窗中坐

含情獨不語
落日窗中時
妾意與君意
相思只自知


領邊繡

出門重新製
纖手行自整
願作花工兒
長年承素頸

無題

斗覺瓊枝瘦
慵開寶鑑妝
臨風恐仙去
倚扇怯歌長
綠

桂薰輕服靈符佩縹囊西鄰空自賦不解到君傍



宛陵集卷二

欽定四庫全書

集部

宛陵集卷三至五

詳校官庶吉士臣張溥

檢討臣何思鈞覆勘

覆校官博士臣劉光第

校對官主簿臣汪日贊

謄錄舉人臣曹夢齡

欽定四庫全書

宛陵集卷三

宋 梅堯臣 撰

依韻和希深新秋會東堂

何必水周堂
脩然萬木涼
朋簪茲共樂
節物自迎商
巧笑承歡劇
新詞度曲長
驟鸞悲霧扇
泛蟻醕雲漿
並蒂榴房熟
連叢桂蕊香
人初投轄醉
客甚摻櫓
狂鬢約寒鴉
碧衣輕舞蝶
黃流波閑任
注錯席豈依
行疊疊談寧
倦厭厭夜未
央良時誠可
惜清燕此無
荒

客鄭遇曇穎自洛中東歸

禪衣本壞色不化洛陽塵獨有煙霞染况將山水親西
風入關戍宿雨過城闌誰羨飄然迹吾車亦已巾

馬判官歸闕

與君歸洛陽仕宦頗相偶往苒遷歲時徘徊樂文酒今
歸已及瓜爲贈聊折柳亦將隨計書慘別寧嗟久

餞彭城公赴隨州龍門道上作

零雨送車輪初清遠陌塵歸藩漢東國遮道洛陽人伊

水照虹旆楚山懷玉麟征軒不可戀梗淚返城闌

早行道中相逢

黯黯雨雲晦駸駸車馬緜唯憂不及見及見反無言

古意

故人留雅曲今與新人彈新人聽不足復使後人歡

送弟良臣歸宣城

喬木句溪邊秋光幾曲連將歸三畝宅遠寄下江船伴
爾唯征鴈悲予有暮蟬親朋如見問貧外似當年

河南張應之東齋

昔我居此時鑿池通竹圃池清少游魚林淺無棲羽至
今寒窗風靜送枯荷雨雨歇吏人稀知君獨吟苦

河南王尉西齋

官舍古城隅西齋何寂寂種竹幽趣深開屏翠光滴青
山露南牆落日明東壁危臺起其傍平隰坐可覲歲暮
野田空天高霜隼擊更憐風月時幾弄林間笛

劉秀才歸河內

君家太行下應復近蘇門河氣知寒早嵐煙覺暮昏犬
鳴林外火笛響月中邨久作山陽客逢人爲寄言

憶洛中舊居寄永叔兼簡師魯彥國

東堂石榴下夜飲曉未還絺衣濕皓露桂酒生朱顏君
同尹與富高論曾莫攀開吐仁義興傲睨天地間以此
爲朋樂衡門未嘗關自從北闕來擾擾時少閑登危欲
引望尚不見雲山何由覲夫子客袂淚瀾斑

武陵行

生事在漁樵所居亦煙水野艇一竿絲朝朝狎清泚忽
自傍滕陰乘流轉山背始覺景氣佳潛通小溪裏常時
不見春入谷驚紅蕊幽興窮綠波翫芳心莫已花外一
峰明林間碧洞啟遙聞雞犬音漸悟人煙邇捨舟遂潛
行石徑劣容屣豁然有田園竹果相叢倚危眉髻髻人
倏遇心顏喜尚作秦衣裳那知漢名氏自言逢世亂避
地因居此來時手種桃今日開如綺更看水上花幾度
逐風委競引飯彫胡邀歡酌瓊醴復呼童穉前綠鬢仍

皓齒翻遣念還茅思歸釣鱸鮑將辭亦贈言勿道邱壑
美鼓枻出仙源繁英猶灑迤薄暮返蒼洲微風吹白芷
他日欲重過茫茫何處是

西宮怨

漢宮中選時天下誰爲校寵至莫言非恩移難恃貌一
朝居別館悔妒何由效買賦豈無金其如君不樂

夏夜小亭有懷

西南雨氣濃林上昏月色寒影不隨人寥寥空露白

外兄施伯侃下第赴并門叔父招

共是干時者同爲失意人言趨太原召如慰宛陵親笳
鼓聽臨塞琴書未離身別君無斗酒當識士安貧

鄭賊及第東歸後赴洋州幕

卻生方得桂王榮始從戎一舸辭吳會單車入漢中亂
山雲木古側徑野泉通欲識風煙美心知故國同

施判官赴饒州

昔日里中舊今爲幕下英煙波歸楚國風月滿都城食

有江魚美時無羽檄驚他年儻行縣肯使折腰迎

楊旼赴官并州

嘗聞地近湖寒氣盛中都車馬行臨塞關山見落榆吳
鉤皆尚壯章甫幾爲儒寄謝西曹掾能吟秀句無

歐陽寺丞桐城宰

葉落淮南樹青山徧馬頭人煙將近郭松竹不知秋夜
虎林間嘯溪泉舍下流門前仲卿廟遺迹待君求

朱邑冢祠

在馬

祝熙載赴任東陽

李都尉客

東陽美山水之子本風流稍去何平叔還追沈隱侯清
江飛晚雨斜日半滄洲縣道行無媿煙蘿有勝遊

彥國通判絳州

結友時未久情親心已照氛埃外自遣風月還同調復
與任浮沉未嘗趨近要以此雖處貧寧防俗者誚今將
辭我去盡日來談笑窮巷敞茅茨高言出廊廟且作朱
戟行聊能發光耀當亦就銅墨遠之江海徼山郭寂無

喧雲川不妨釣所嗟胡越人千里煩登眺

餘姚陳寺丞

試邑來勾越風煙復上游江湖自迎客山月亦隨舟
海貨通閭市漁歌入縣樓絃琴無外事坐見浦帆收

明州推官鄭先輩

應幕海邊郡秋風千里歸隨潮吳榜駛轉浦楚山微野
橘霜前熟江螯露下肥還家候靈鵲人想罷鳴機

聚蚊

日落月復昏飛蚊稍離隙聚空雷殷殷舞庭煙霧霧蛛
網徒爾施蟾斧詎能磔猛蝎亦助惡腹毒將肆螫不能
有兩翅索索緣暗壁賢人居大第蛟綃圍枕席嗟爾於
其中寧夸背如戟忍哉傍窮困曾未哀癯瘠利吻競相
侵飲血自求益蝙蝠空翱翔何嘗爲屏獲鳴蟬飽風露
亦不慙喙息薨薨勿久恃會有東方白

賦秋鴻送劉衡州

沅

秋鴻整羽翮去就自因時往春南方來遂止天泉池天

泉水清泚駕鷺日追隨蒲藻豈不樂江湖信所宜今朝
風色便暫向衡陽歸洞庭逢葉下瀟湘先客飛渚有蘭
杜美心無稻梁早曾繳勿爾念鷹隼寧爾窺煙波千萬
里足以資盤嬉峰前想回日青冥生路岐

清池

泠泠清水池藻荇何參差美人留采掇玉鮪自揚鬐波
瀾日已淺龜鼈日復滋蝦蟇縱跳梁得以緣其涯競此
長科斗凌亂滿澄漪空有文字質非無簡策施仙李勿

苦羨寧將麤蛤卑徒剖腹中書悠悠誰爾知聊保性命
理遠潛江海湄泚泚曷足道任彼鼃鼃爲

弟得臣歸覲并州

知君歸去心已逐秋風起明發登太行遙將望汾水
謁白雲下吾親正居此拜慶曷爲榮新除缺官美

張脩赴威勝軍判官

青驪渡河水俠氣動刀環入幕沙塵暗臨風鼓角閒
地形通柏谷秋色滿榆關誰復輕儒者難淹筆硯間

弔唐俞

通閨年最少才俊罕能雙鵬去塵棲室魂歸霧起窗慈
親留漢水愛妾返荆江一棹纔能語梵然寄遠邦

任適尉烏程

俛作程鄉尉折腰還自甘卞峰晴照黛雲水曉澄藍葑
上春田闢蘆中走吏參到時蘋葉長柳惺蓋江南

馬殿丞通判密州

晨裝辭北闕懷紱貳東戾地本全齊勝風仍變魯優危

帆淮上去古木海邊秋相送江潭客曾同十載遊

夏戾彥濟武陟主簿

懷縣曾余往風謠爲爾知寒先太行近潤接大河卑
賓酒材公秫晨羹翦露葵簿書行正委何以布衣時

余居御橋南夜聞祆鳥鳴效昌黎體

都城夜半陰雲黑忽聞轉轂聲咿啾嘗憶楚鄉有祆鳥
一身九首如贅疣或時月暗過閭里緩音低語若有求
小兒藏頭婦滅火閉門雞犬不爾留我問楚俗何苦爾

云是鬼車載鬼遊鬼車載鬼奚所及抽人之筋繫車輶
昔聽此言未能信欲訪上天終無由今來中土百物正
安得遂與南方儔上帝因風如可達願令驅逐出九州

月夜與兄公度納涼閑行至御橋

夕月吐澄明陰雲淨如埽空庭引天翠爽氣生懷抱家
近御橋頭因爲橋畔遊倚欄波上影不共水東流思歸
此清夜何處是江樓四望遠寂歷微風動颼颼觀闕垂
萬象山河趨九州壯哉帝王宅顧我一蜉蝣富貴非可

取田園今向秋明當拂衣去試與問扁舟

隨州錢相公挽歌三首

築巖無往夢遊岱有飛魂
隨淚隋侯國遺金漢帝恩
文章留日域忠孝在王門
天道何由問秋風徧九原

昔日傷歸國今朝歎舉輶
憂愁傳楚些殄悴感周詩
文章明時訪忠言故吏知
居常嗚咽涕翻作衆人悲

去年伊水上傾府望雲岑
路轉猶回首人誰不殞心
可憐飛語後擠恨九幽深
從此埋英骨空令淚滿襟

僧可真東歸因謁范蘇州

仲淹

姑蘇臺畔去雲壑
付清機野策過寒水
山童護衲衣松門
正投宿竹笠帶餘暉
誰愛杼山句使君應姓韋

廖秀才歸衡山縣

千里倦爲客秋歸烏榜輕
過林湘橘暗收潦楚江清
晚泊親鷗鷺殘芳襲杜蘅
長沙幾日到天際見高城

魏屯田知楚州

淮南木葉驚淮上使君行
天外高帆出沙頭候吏迎
夜

潮通廢埭秋月滿孤城正遲文翁化從來楚俗輕

張子野赴官鄭州

盡室寄東里一官辭上都只應乘小駟寧肯躡雙鳧秋
雨生陂水高風落廟梧梅山爲余訪還有舊家無

擬王維偶然作

嵇康任天性傲散喜端居自云安卑者竊比老莊歟一
月十五日頭面忘洗梳危坐恣搔蟲於時嬾作書一曲
情自寄一杯歡有餘尚予志所慕阮生甘不如黃精可

養壽廣澤宜觀魚不堪行作吏章服裹猿狙

蘇祠部通判洪州

飛鷁去江西秋飈滿桂旗蘆州花白處楓岸葉丹時沙
鳥看來沒雲山愛後移高才屬滕閣家擅子卿詩

中秋與希深別後月下寄

薄霧生寒水寥寥畫船人傷千里別桂吐十分圓把
酒非前夕追憶去年南樓足佳興好在謝林川

望芒碭山

出舟跳古岸林外見脩岡回頭問榜子前巘是芒碭其
顛有高廟松柏鬱蒼蒼迤邐堆阜屬蕭條茆葉黃千古
收王氣一川平夕陽人家纔四五雞犬自相望尚爾想
新豐誰復思沛鄉臨流一舉酒可以喻悲傷

初見淮山

遊宦久去國扁舟今始還朝來汴口望喜見淮上山斷
嶺碧峰出平沙白鳥閑南歸不厭遠況在水雲間

旌義港阻風

清晨下長淮忽值秋風惡渺瀰雲霧昏掀合魚龍作方
驚白浪高又以寒潮落遠渚時出沒輕舟自前却將投
古戍迷偶得孤港泊下纜寄蘆林尋邨步芒屨儻有白
醪酤聊爲野田酌茆屋何颺颺瓦罌空索索却持杖頭
歸相顧還寂寞一夕不能眠孤吟當狂藥

依韻和劉六淮潮

汐潮如有信時向舊痕生始覺回波定還看曲渚平舞
鷗隨上下寒日共浮傾後夜人無寐遙聽入浦聲

舟中聞蛩

秋月滿行舟，秋蟲響孤岸。
豈獨居者愁，當令客心亂。
展轉重興嗟，所嗟時節換。
時節不苦留，川塗行已半。
霜落草根枯，清音從此斷。
誰復過江南，哀鴻爲我伴。

雙野鳧

野水雙紋翼，雲羅謾自媒。
驚飛帶波起，行唼拂萍開。
暖日浮還沒，寒汀去復來。
王喬如可挹，仙舄此徘徊。

和才叔岸傍古廟

樹老垂纓亂祠荒向水開
偶人經雨路古屋爲風摧
野鳥棲塵坐漁郎奠竹杯
欲傳山鬼曲無奈楚辭哀

山光寺

煬帝
故宮

古橋經廢寺蒼蘚舊離宮
柏殿秋陰冷蓮堂暮色空
鳥啼山靄裏僧語竹林中
寂寞蕪城近蕭蕭牧笛風

自急流口至長蘆江入金陵

始發碧江口曠然諧遠心
風清舟在鑑日落水浮金
瓜步逢潮信臺城過鴈音
故鄉何處是雲外即喬林

早渡長蘆江

帶月出寒浦殘星浸水濱帆開風色正舟急浪花分霧
氣橫江白雞聲隔岸聞天晴建業近鍾岫起孤雲

采石懷古

青峰來合沓勢壓大江雄舟渡神兵後城荒王氣空山
根魚浪白巖壁石蘿紅弄月人何在孤墳細草中

望夫山

亭亭千古質曾是念征夫一作山頭石畏看天際塗猶

如託蘿蔓不似采蘿無時有江雲近仙衣挂六銖

泊牛渚磯

所謂鼓吹山也
有竹可作笙竽

落帆牛渚前便爲牛渚宿波搖殘照中采翠浮巖谷巖
谷足幽篁石上羅寒玉裁作媧氏笙堪吹鳳凰曲楚客
夕無眠獨將清籟續更看江月來還想燃犀燭

遊響山

久憶門前勝聊乘逸興遊寒篙進溪曲古木暗城頭鳥
過空潭響船隨碧瀨流梅花三疊罷煙火起滄洲

蕪湖口留別弟信臣

少也遠辭親俱爲異鄉客昨日偶同歸今朝復南適
南適畏簡書叨茲六百石重念我當去送我江之側
溪山遠更清溪水深轉碧因知惜別情愈賒應愈劇

金霞閣

登臨無盡興清燕日徘徊霞影綠觚落嵐光入牖來
離宮分碧瓦太液俯青槐好待邀明月瑤琴爲一開

送蟾上人遊南嶽

葉下瀟湘閣杯浮豈道遲賓鴻不到處危約獨行時翠
嶺祝融宅喬松虞舜祠雲霞遊徧日振錫更何之

王公慥東歸

行色上東陌秋槐葉亂飛囊無一錢用篋有古書歸羸
駟嘶寒草荒城背落暉莫嫌牛馬隔走別八行稀

幾道隰州判官

清曉赴國門西風生早涼天地大道出苑樹短亭傍相
看車馬色共照池水光舉酒酒非淺明朝誰重觴話別

語難盡去後空回腸計彼行路遠幾日至洛陽洛陽多
舊友一一道相望失意非憔悴懷昔無悲傷無由戀中
國不久之南方音書儻能問鴻鴈亦能翔此外念出處
便爲參與商到官秋節晚塞近百草黃定隨劉武威校
獵赤土岡余方楓林下野艇泛滄浪弄月江波闊胷衣
淩荇香雖知各所適未免涕霑裳操袂却引顧煙蕪平
夕陽獨回唯鳥影相與過林塘朋游頓茲減客心仍未
央

[illegible]

宛陵集卷三

欽定四庫全書

宛陵集卷四

宋 梅堯臣 撰

池州進士陳生惠然見過不日且行因以詩贈

別

呼童具雞黍頗識故人期
竹館忽枉駕山樽聊解頤
醉歌返北郭春雨生東陂
便與千峰隔登高空復思

春陰

濃澹雲無定淒微氣宇寒
鳩鳴桑葉吐邛暗杏花殘
客

子行裘薄春塘野水寬輕雷欣已發謬作採茶官

春晴對月

雲埽魚鱗靜天開桂魄清梨花鑑中色杜宇晝時聲寥落將寒食羈離念故京都無惜春意樽酒爲誰傾

植梔子樹二窠十一本於松側

舉世多植藥而我學種梔顏色固不別良苦誠異宜團團綠階側豈畏秋風吹同心誰可贈爲詠昔人詩

百舌

天窗明未明
颼颼過微雨
已聞高樹頭
百舌間關語
幽人枕上聽
不聽變盡春
聲始飛去

提壺鳥

山路暗松篠
幽禽語前後
上言勸提壺
下言勸酤酒
但取醒復醉
莫問升與斗
人生朝菌榮
綠髮可無負

青梅

梅葉未藏禽
梅子青可摘
江南小家女
手弄門前劇
齒軟莫勝酸
弃之曾不惜
寧顧馬上郎
春風滿行陌

挾彈篇

長安細侯年尚小，獨出春郊不須曉。
手持柘彈霸陵邊，豈惜金丸射飛鳥。
金丸射盡飛鳥空，解衣市酒向新豐。
醉倒銀罍方肯去，去臥紅樓歌吹中。
不管花開與花老，明朝還去杜城東。

五日登北山望競渡

南山傳競渡，多在屈平祠。
簫鼓滿流水，風煙生畫旗。
千橈速飛鳥，兩舸刻靈螭。
盡日來江畔，誰知輕薄兒。

寄新安通判錢學士

昔人言訪舟江水賦清泚冬春常一色深淺皆見底崖
日半寒潭登明動朱鯉君懷素已高塵慮都應洗

得歐陽永叔回書云見來客問予動靜備詳

昨日使人回聞君與之坐君問我何爲但云思寡過寡
過真未能得便北窗臥此趣今已深世間誰與和

建德新牆詩

山廨不營堵筠篁爲密籬初年固可蔽晏歲不能支已

被巢蜂蠹復爲荒葛藟夏雨久枯脆秋風遂傾歎雞鶩
恣穿逸牛羊來踐窺我議欲板築羣走皆不怡首吏先
進白土疎不可爲潦雨忽暴集澗流如突馳我心墮其
極斯語其見欺用竹乃戶率破得緣而私冬歛葺西角
春調完北陲循環日有壞煩擾無虛時介決勿爾惑遂
飭闢其基榛莽一芟去畚鍤能悅隨膏潤非朽壤峭削
隱金鎚荏苒未踰月屹如長雲垂疏塹備水害既圻復
蓬茨豈唯禦獮豹亦以防狐狸且有內外隔絕聞閭巷

卑安然茲燕息來者勿吾隳

九月五日得姑蘇謝學士寄木蘭堂官醢

公田五十畝種秫秋未成杯中無濁酒案上唯丹經忽
有洞庭客美傳烏與程言盛木蘭露釀作甕間清木蘭
香未歇玉盞貯華英正值菊初坼便來花下傾一飲爲
君醉誰能解吾醒吾醒已不解百日毛骨輕

九月見梅花

江南風土暖九月見梅花遠客思邊草孤根暗磧沙何

曾逢寄驛空自聽吹笳今日樽前勝其如秋鬢華

新安錢學士以近詩一軸見貺輒成短言用叙

單悃

早事太尉府謬以才見論身作邑中吏日陪丞相尊嵩
山雲外寺伊水渡頭邨泉味入香茗松色開清樽題詩
人半醉馬上景已昏歸來屬後乘冠蓋迎國門悠悠失
貧賤冉冉歷涼溫而今處窮僻落莫思舊恩終日自鮮
適終年長不言已覺人事寡惟聞雞犬喧東風有來信

滿幅蘭與捺深知故人意遺我滌冥煩一章言罨畫谿
好如目存何須到雲壑便若遊花源一一先造化可以
輕瑤琨成誦今在口願將醒病魂

荅陳五進士遺山水枕屏

妙畫能成趣谿山迴得君漁舟長映浦巖樹半藏雲征
鳥無時沒橫橋有處分數峰來枕席曾不媿移文

謝賓客挽歌三首

位不登三事才宜列四科清名時自得華寃世空多望

氣悲埋劒臨風歎逝波吳阡蒿作里楚挽薤成歌會葬
千人至來觀數郡過無由親執紼東首淚滂沱

自昔居門下游觀必許偕豈將千里別遂作九泉乖已
恨霜松折行嗟玉樹埋蒼生空有望丹旄不勝懷曩日
言歸里飛章願乞骸今朝赤松畔煙壠對蒼崖

當年罷會稽還郡錦爲衣老作龍樓貴終將鳳沼違英
魂遊岱去石椁渡江歸揚子春風惡南徐過客稀衆帆
着屢溺素舸獨如飛始見中郎孝松門自有輝

往東流江口寄內

艇子逐溪流來自碧江頭隨山知幾曲一曲一增愁巢
蘆有翠鳥雄雌自相求擘波投遠空丹喙橫輕脰呼鳴
乃不已共啄向蒼洲而我無羽翼安得與子遊

代內答

結髮事君子衣袂未嘗分今朝別君思歷亂如絲棼征
僕尚顧侶嘶馬猶索羣相送不出壺倚楹羨飛雲日暮
秋風急雀聲檐上集并作千里愁愁極翻成泣

訪礦坑老僧

山深無外事日夕愛潺湲
趺坐樹間石力耕溪上田
解言南國事能詠碧雲篇
莫貴遠公酒余非陶令賢

除夕與家人飲

莫言寒漏盡春色來應早
風開玉砌梅薰歇金爐草
穉齒喜成人白頭嗟更老
年華箇裏催清鏡寧長好

立春在元日

新春與新歲時候不相先
未肯欺殘臘何曾占舊年
綴

條花翦綵插戶柳生煙獨坐空山裏唯驚節物遷

遊水簾巖

春山時獨往榛穢旋芟斲飛泉蔽幽巖杳謁疏朝旭光
垂白龍顙鳴漱寒潭玉半壁生畫寒陰草潤秋綠穿藤
出溪口流沫縈山足莫遣吏人來方歌白雲曲

詠官妓從人

少爲輕薄誤失行落優倡去作小家婦願同貧里裝無
心歌子夜有意學流黃他日東郊上誰人見採桑

夏雨

林梅初美熟密雨閉重關潤裊衣巾上涼生竹樹間水聲通遠澗雲色暝前山野鳥寂無語公庭盡晝閑

五日與陳真卿飲

五日逢南國三年別舊都招魂傳楚客撫節見靈巫蒿艾因時採蛟龍為俗驅清樽與鷺炙忻此故人俱

彼鴛吟

斷木啄雖長不啄柏與松松柏本堅直中心無蠹蟲廣

庭木云美不與松柏比
臃腫質性虛朽蠋招猛
獗主人赫然怒我愛爾
何毀彈射出窮山群鳥
亦相喜啁啾弄好音自
謂得天理哀哉彼鴛鴦
吻血徒爲爾鷹鷂不搏
擊狐兔縱橫起況茲樹
腹急力去宜濱死

感遇

衆默瘖莫辨衆寐盲不知問而使之對覺而使之窺瘖
盲自窮矣所感在一時苟昧哲人理寐默定妍媸

雪詠

雪色混青冥，寒幃宿酒醒。
龍蛇緣古木，鳳鵠舞幽庭。
密勢因風力，輕姿任物形。
公堂何寂寞，橫案對玄經。

臘日出獵因遊梅山蘭若

我與二三騎，爭馳孤戍旁。
逐麋逢野寺，息馬據胡牀。
鷹想支公好，人思灞上狂。
歸來何薄暮，煙火照溪光。

依韻和楊敏叔吳門秋晚見寄

方在洞庭上，秋懷那得禁。
西風楚波急，度鴈海雲陰。
洛客吟初苦，騷人思已深。
顛毛隨日減，冉冉不勝簪。

田家

南山嘗種豆碎英落風雨空收一束其無物充煎金

陶者

陶盡門前土屋上無片瓦十指不霑泥鱗鱗居大廈

縣署叢竹

裊裊幽亭竹團團自結叢寒生綠樽上影入翠屏中陶
柳應慙弱潘花只競紅方持雪霜操不敢倚春風

巧婦

巧婦口流血辛勤非一朝
芳茶時補絳風雨畏漂搖
所託樹枝弱而嗟巢室翹
周公誠自感聊復賦鴟鴞

聞歐陽永叔謫夷陵

共在西都日居常慷慨言
今嬰明主怒直雪諫臣冤
謫向蠻荆去行當霧雨縣
黃牛三峽近切莫聽愁猿

聞尹師魯謫富水

朝見諫臣逐暮章從謫官
附炎人所易抱義爾唯難
寧作沈泥玉無爲媚渚蘭
心知歸有日時向斗牛看

寄饒州范待制

山水番君國文章漢侍臣古來中酒地今見獨醒人坐
嘯安浮俗談詩接上賓何由趨盛府徒爾望清塵

詠王右丞所畫阮步兵醉圖

胡公疎
新勒石

右丞筆通妙阮籍思玄虛獨畫來東平倒冠醉乘驢力
頑不肯進俛首耳前趨一人牽且顧一士旁挾持捉鞍
舉雙足閉目忘窮塗想像得風度纖悉古衣裾玉骨化
爲土丹青終不渝而今幾百歲乃有胡公疎買石遂留

刻漬墨許傳模白黑就髣髴毫芒辨精麤千古畜深意
終朝懸座隅誰謂盈尺紙不慙雲霧圖

猛虎行

山木暮蒼蒼風淒淅葉黃有虎始離穴熊羆安敢當掉
尾爲旗毒螫磨牙爲劍鋌猛氣吞赤豹雄威躡封狼不貪
犬與豕不窺藩與牆當塗食人肉所獲乃堂堂食人既
我分安得爲不祥麋鹿豈非命其類寧不傷滿野設置
網競以充圓方而欲我無殺奈何飢餒腸

白鷗

喬木暗青山晴川下白鷗春雲生嶺上積雪在巖間綠
草張新翳柔冠總翠髮時哉養文素不是雜斑斑

後園桃李花

後園桃李花灼灼復皎皎南枝開已徧北枝繁尚少
鵲相輝映根本自鈎繞無爲驚風吹紛紛逐飛鳥

道傍虎跡行

朝履猛虎迹暮宿猛虎林猛虎終夜嘯陰風生遠岑我

懷何所畏所畏在官箴傷哉此遺體冒險輕百金

脩真觀李道士年老貧餓無所依忽縊死因爲
詩以悼之

唐室王子後黃冠事隱淪餐霞不滿腹披雲不蔽身八
十不能死縊以頭上巾始慕老莊術終厭道德貧營營
求長生反困甌中塵

野田行

輕雷長陂水農事乃及辰茅旌送山鬼瓦鼓迎田神青

皋暗藏雉萬水欣已春桑間耦耕者誰復來問津

水輪詠

孤輪運寒水無乃農者營隨流轉自速居高還復傾利
纔畎澮間功欲霖雨并不學假混沌忘機抱甕罌

山邨行

征馬去不息幽禽隨處聞深源樹翁鬱曲塢花氛益澹
澹平田水濛濛半嶺雲長髮弄春女溪上自湔裙

鳴雉詞

雄雉鳴桑林雌雉雒麥隴結愛誠有宜別啄義亦竦哺
雛深莽中推顏錦翅擁辛勤何爾爲應自念遺種

寄公異弟

池塘去後春一夕生綠草無由夢阿連詩句何能好

去春城

前日去春城今朝還故陌馬有甚煩意人多遠行色暫
爾厭風埃那堪爲久客

讀范桐廬述嚴先生祠堂碑

二蛇志不同相得榛莽裏一蛇化爲龍一蛇化爲雉龍
飛上高衢雉飛入深水爲蜃自得宜潛游滄海決變化
雖各殊有道固終始光武與嚴陵其義亦云爾所遇在
草昧既貴不爲起翻然歸富春曾不相助治至今存清
芬烜赫耀圖史人傳七里灘昔日來釣此灘上水濺濺
灘下石齒齒其人不可見其事清且美有客乘朱輪徘徊
回想前軌著辭刻之碑復使存厥祀欲以廉貪夫又以
立懦士千載名不忘休哉古君子

禽言四首

子規

不如歸去春山云暮萬木兮參雲蜀天兮何處人言有
翼可高飛安用空啼向高樹

提壺

提壺蘆酤美酒風爲賓樹爲友山花繚亂目前開勸爾
今朝千萬壽

山鳥

婆餅焦兒不食爾父向何之爾母山頭化爲石山頭化石可奈何遂作微禽啼不息

竹雞

泥滑滑苦竹岡雨蕭蕭馬上郎馬蹄凌兢雨又急此鳥爲君應斷腸

讀漢書梅子真傳

子真實吾祖耿介仕炎漢權臣始擅朝忠良被塗炭輦下莫敢言上書陳治亂是時卿大夫曾不負媿汗其文

信雄深爛然今可玩危亡識禍機滅迹思汗漫一朝弃
妻子龍性寧羈絆九江傳神仙會稽隱屢閉舊市越溪
陰家山鏡湖畔唯餘千載名撫卷一長歎

宛陵集卷四

欽定四庫全書

宛陵集卷五

宋 梅堯臣 撰

贈黃庭筠舉進士

橘柚生南國幽林日蔥蒨上有嘉禽鳴五色被餘絢彼
美發華英厥包待秋薦根本當自持無爲風土變

和滕公游穿山洞

洞口水石淺潺潺瀉綠蒲緣源進巖竇陰黑入境殊中
言有物怪蟠蟄春未蘇霖雨雖有意風雷莫肯扶風雷

自鼓盪不久當何如幸欣禪林近鐘梵來有無回策屨
幽逕衣草露濡老僧長松下麋鹿與之俱溪雲時見
起山鳥自相呼羨爾得茲樂何用勞形軀

陳真卿將有秋試條見訪不日告行送於北門
歌鵲庭為五言以贈

送君北岡上舉酒歌黃鵠黃鵠去何高天池待棲宿寧
復戀江湖聊茲混雞鶩暉暉振羽裳不羨淵明菊

秋日詠蟬

羣蟲喜炎熱此獨愛高陰薄蛻聊依葉清深已出林人
閑感衰節風急雜遘砧虛腹曾何竟常憂蟪蛄侵

范饒州夫人挽詞二首

聽飲大夫日止言京兆辰嘗憂伯宗直曾識仲卿貧蒿
里歸魂遠芝山旅殯新江邊有孤鶴嘹唳獨傷神

君子喪良偶拊棺哀有餘莊生慙擊缶潘岳感游魚夕
苑凋朱槿秋江落晚蕖猶應思所歷入室淚連如

弔礪坑惠燈上人

生棲雲際燼沒葬寺傍邨破案殘經卷新墳出樹根松
悲隔溪路月照舊山門自昔多詩句而今幾許存

寄題石埭權縣樂尉碧瀾亭

遙知溪上亭秋水瀟泠泠雲影無時翠嵐光到底清危
樓喧晚鼓驚鷺起寒汀聊作淵明飲臨流酒易醒

斑竹管筆

翠管江潭竹斑斑紅淚滋束毫何勁直在素許操持欲
寫湘靈怨堪傳虞舜辭蔚然君子器安用俗人知

古意

月缺不改光，劍折不改剛。
月缺魄易滿，劍折鑄復良。
勢利壓山岳，難屈志士腸。
男兒自有守，可殺不可苟。

觀博陽山火

十月原野枯，連山起狂燒。
高燄過危峰，飛火入遐嶠。
玉石被焚灼，誰能見輝耀。
猿猱失輕捷，亦不暇相弔。
長風又助惡，怒號生萬竅。
炎炎赤龍奔，剴剴陰雷笑。
願傾寒江潮，勢逆難沃澆。
願傾天河水，雖順雲衢遙。
青松心已

爛蔓草根未焦小農候春鉏寒客失冬樵誰知兼并子
平陸閑肥饒不易天地意長養非一朝

聞鴈寄歐陽夷陵

閑坐獨無寐鴈來更未闌聲長河漢迴影落戶庭寒荆
楚橘包熟瀟湘楓葉丹南飛過三峽試問故人看

送謝舍人奉使北朝

漢使下西清邊人擁道迎寒笳隨宿堡衛甲出孤城犯
雪貂裘重衝風錦綬輕山川辭國遠車騎踏沙行授館

羶爲幄供庖酪和羹戎王拜天賜敵帥伏名卿紫塞千
烽靜黃雲萬里平甘泉歸奏日重見鳳池榮

觀放鷄子

白晳少年子秋郊臂蒼隼日暖飢目開風微雙翅緊草
際鳴鶉驚蒿間黃雀窘下韝誠必獲得俊還復哂碎腦
此非草食肉爾何忍取樂在須臾我心良惻憫

食橙寄謝舍人

洞庭朱橘未弄色襄水錦橙已變黃玉臼擣齏憐鱸美

金盤案酒助杯香雖生南土名猶重未信中州客厭嘗
欲寄白苞憑驛去只應佳味怯風霜

夜聞居人喊虎

猛虎豈云猛潛藏伺天昏行行出叢薄稍稍入孤邨孤
邨何所利所利犬與狔誰知仁者勇去惡義自敦

採白朮

吳山霧露清群草多秀發白朮結靈根持鋤採秋月歸
來濯寒澗香氣流不歇夜火煮石泉朝煙徧巖窟千歲

扶玉顏終年固玄髮曾非首陽人敢慕食薇蕨

寓言

寒燈不照遠光止一室明小人不慮遠義止目前榮燈
既無久燄人亦無久情誰言結明月明月豈長盈

送李尉子京之邵武光澤

母老不擇祿一官勤夙興長河未結凍去客已懷冰露
蟬不飽腹志士甘曲肱遠方人所畏所畏非所兢

銅坑

碧鑛不出土青山鑿不休青山鑿不休坐令鬼神愁

朝日

日色纔出海曉月無光彩曉月在青空不與日色同誠
知大君德照耀無不通

失鷓鴣

愛翫日已久開籠爲馴故點臆雪花圓連袂浪紋素鉤
輒格磔鳴耗耗翻翁去誰知煙渚深綠水脩篁處

過小石潭

樹老石連潭潭深煙翠入羣魚石下游獨鳥潭上立泉
暖草長綠山高風自急徘徊興不窮苔屐雲霑濕

縣齋對雪

密雪夜來積起見萬物春山川忽改色草木一以新古
邑失荒穢王路覆平均從茲慶豐年蹈詠慙小臣

對花有感

新花朝竟妍故花色顚顚明日花更開新花何以異

山中夜行

孤客心多恐寒風夜度溪山長羸馬困月黑怪禽啼遠
火生樵舍荒榛亂野蹊喜言林館近聞犬入猶迷

咏木

中國啄盡蟲未肯出林飛不識黃金彈雙翎墜落暉

夢與公度同賦蕩華追錄之

吳王舊宮闕水殿芙蓉披濁泥留玉骨疑是葬西施
施魂不滅嬌豔照清池

和綺翁遊齊山寺次其韻

蒼山南望截雲煙中有紺宇通諸天長橋直度清溪水
寒湖收潦曠平田古木陰森大堤上千峰濃澹高樓前
龍筍未迸角出縮虎石亂踞筋拳攣陰崖乳泉濕苔蘚
陽谷暖氣留蘭茝澗戶曉闢煙的的松軒夜啟月娟娟
聞有謫仙來興入飄然欲拍洪崖肩玩游逐勝不覺遠
露竒發怪工無全捫蘿但識康樂徑飲酒安問遠公禪
清猿不到俗士耳香草已入騷人篇水鳥念佛次淨界
野鹿銜花來象筵在昔探賞猶可數深景秀句今得傳

辭韻險絕茲所駭何持杜牧專當年重以平澹若古樂
聽之疏越如朱絃祕藏褚中爲不朽咨諏坐上皆曰然
誰意廳官獲此貺洗去鄙吝空池邊聊欲報言罕驛使
春郊唯見鴈連連

范待制約游廬山以故不往因寄

平昔愛山水茲聞廬嶽遊遠期無逸興獨往畏湍流舉
手謝雲壑棲心慙鳥鷗香爐碧峰下應爲一遲留

范饒州坐中客語食河豚魚

春洲生荻芽春岸飛楊花河豚當是時貴不數魚鰕其
狀已可怪其毒亦莫加忽腹若封豕怒目猶吳蛙庖煎
苟失所入喉爲鎔鄒若此喪軀體何須資齒牙持問南
方人黨護復矜誇皆言美無度誰謂死如麻我語不能
屈自思空咄嗟退之來潮陽始憚餐籠蛇子厚居柳州
而甘食蝦蟇二物雖可憎性命無舛差斯味曾不比中
藏禍無涯甚美惡亦稱此言誠可嘉

徐元與見邀與諸君同遊至峰山溪上作

春霽重行行行在墟里攄懷厭樓觀寓興欣山水斷
壁翠連雲寒流清見底主人開綠樽下馬臨芳芷澄溜
瀉灣潏跳波生石齒園林始弄萼皋隴時鳴雉談謔忘
機心笑言驚俗耳曠哉茲日遊何羨稽山美

和元興遊春次用其韻

乘閑多遠興信馬與君行碧樹斜通市清流曲抱城山
花高下色春鳥短長聲日暮吾廬近還歌空復情

留別李君君頗有歸意而未遂

酌我樽中酒知君羨北歸如何沙上鳥遠逐片帆飛

離蕪湖至觀頭橋

江口泊來久菰蒲長舊苗爭雛洲鵲鬪遺子浦魚跳宿
岸欣逢戍歸船競趁潮時時望鄉樹已恨白雲遙

馬秘書始約同行久而未至因以寄

渡江落我前入汴居我後日日是南風時時爲回首逢
船一借問遠擢見來否明朝儻相及閑步河堤柳

寄建德徐元興

才子方爲邑千峰對縣門
靜寒琴意古閑厭鳥聲喧
山茗烹仍綠池蓮摘更繁
訟稀應物詠庭下長蘭蓀

詠苜蓿

苜蓿來西域蒲萄亦既隨
胡人初未惜漢使始能持
宛馬當求日離宮舊種時
黃花今自發撩亂牧牛陂

汴河雨後呈同行馬祕書

雨霽晚虹收河堤淨如埽
清陰拂人樹翠色垂流草
漢漕走王都華言雜夷獠
時方同馬生野泊聊論道

夏日汴中作

倚櫂望平野低雲密未收黃鸝度高柳歸燕拂行舟濁水不堪照清江空憶遊晚晴蒸潤劇喘月見吳牛

夢故府錢公

故相方來夢分明接座隅只知冠劍是不道死生殊西
府看如舊東山詠久徂遽然興寤歎不覺淚霑鬚

謝紫微以畫鷺二軸爲寄

白鷺畫雙素粉毫幽趣多翹沙依折葦刷羽對衰荷浦

思懸秋壁江情憶釣蓑因君遠相寄詩詠對滄波

宿州河亭書事

遠泛千里舟暫向郊亭泊觀物趣無窮適情吟有託
林中鷄舅憚席上蠅虎攫雨久草苗盛田蕪瓜蔓弱香杭
穉子慣脫粟家人薄少年都下來聊問時所作新衣尚
穿束舊服變褻博我今貧且賤短褐隨宜著

晚泊觀鬪雞

舟子抱雞來雄雄踣高岸側行初取勢俯啄示無憚先

鳴氣益振奮擊心非怛勇頸毛逆張怒目背裂肝血流
何所爭死鬪欲充玩應當激猛殺豈獨專晨旦勝酒人
自私粒食誰爾喚緬懷彼興魏傍晚睨當衰漢徒然驅國
衆曾靡救時難羣雄自苦戰九錫邀平亂寶玉歸大姦
干戈託奇算從來小資大聊用一長歎

聞表兄施先輩上第

昔人事功名五十未爲老而今君已及得桂誠非早所
慰白頭親且將黃綬好吾始日夜心望盡京關道拜慶

早歸來莫變秋庭草

雍邱逢錢寺丞載陽

殷勤魏公子落莫吳王孫下客獨垂淚傷心思舊恩

廟子灣辭

廟子灣風俗云有白龍憑險日爲浪潮以驚異上下余過而作辭云

我之東來兮過彼雍邱舟師奏功兮濁水湍流歷長灣兮勢曲鉤傾高斗折兮若奔虬潛伏怪物兮深幽幽發

作暴漲兮爲潮頭土人立祠兮在彼沙洲老木蒼蒼兮
蟬噪啾啾輸卒引絳兮蓬首裸體劇縲囚赤日上煎兮
膠津蹙氣塞咽喉胸溫肩挨同軛牛足進復退不得休
竟持紙幣挂廟陬微風飄揚如喜收我今語神神聽不
何不歸海事陽侯穹魚大龜非爾儔奚必區區此汴溝
驚愚駭俗得有羞去就當決何遲留

送蔡侍禁赴長沙

寒葉下瀟湘之官逐鴈行水經菱浦晚船過橘洲香二

女竹林外三閭楓葉傍平時息戎律物景助才章

送馬廷評之餘姚

越鄉知勝楚君去莫辭進曉日魚鰕市新霜橘柚橋河
流通海道山井應江潮近邑逢鷗鳥先應避畫橈

送秀州海鹽知縣李寺丞

吳帆千里去邑屋富魚鹽霜鶴亭皋唳風鳥海客占滄
涼朝日近翬翠晚山尖若過陸機宅寒蕪應不嫌

送馬廷評知康州

南去晉康郡風帆幾千里辭家上洞庭落葉過湘水
龍吏迎使君壺漿出蠻壘問俗言未通觀風想先喜
曾非異方趣頗與華人擬期子寄梅花無由問行李

過鳴鴈城

九月過鳴鴈斜陽上廢臺兵車千載會桑柘萬疇開
代謝隨秋草英靈化死灰我來空詠古寒鳥有餘哀

送余駕部江州

內史九江行潦收波已清何時鷁舟上遠見爐峰迎野

色連葭菼秋香薦橘橙寒潮如特送不肯過湓城

依韻和陳祕校見寄

鬱鬱東堂桂常期接袂攀羽翰殊不及蓬華却空還江
水幾經歲鑑中無壯顏音塵能見問誰道隔雲山

送張子野祕丞知鹿邑

忽作五年別相逢雙鬢疎不知從此去當見復何如公
秣時爲酒晨庖日有魚沛譙風物美聊以樂琴書

送王紫微北使

天子命儒臣遐方重專對持書下西閣擁節來窮塞貂
服紕蒙茸虎旗光綵綵將迎走羶騎衛從羅金鎧當宣
漢恩德更使敵欣戴幾日過陰山南飛鴈相背

九月都下對雪寄永叔師魯

陰風中夜鳴密雪逗曉積誰言有蓬巷但見鋪瑤席忽
憶在山中開戶羣峰白當時吟不厭盡日坐巖石傍徨
懷故人憔悴爲遷客欲泛剡溪船路長安可適

劉弟示詩一軸走筆荅之

昔與伯氏吟青銅照人髮今又讀君詩寒冰徹人骨時
時探古趣往往到月窟清濟流不休終期至溟渤

劉十秀才見過尋以爲寄次韻和酬

放言破崖岸塵事盡磨刮況此氣澄明幽襟亦軒豁竟
日坐衡茅同心異胡越吾道今不孤長吟爲君發

依韻和劉敞秀才

安得采虛名師道欲吾廣雖然存術業曾不計少長孔
孟久已忘富貴得亦儻後生不聞義前輩懼爲黨退之


昔獨傳力振功不賞舌吻張洪鐘小大扣必響近世復
泯滅務覺多忽怳今子誠有志方駕已屢枉自慙懷道
淺所得可下上正如種青松而欲託朽壤典冊皆可尋
聖言皆可仰幸無增我過此語固不爽

依韻和劉十秋霖

秋草更綠秋霖衰長安遊客未成衣淒淒斗欲變寒色
一夜獨語看燈輝

送劉十往荆渚

臨水一太息解舟當落暉上樓人已遠極目鳥空飛荆
楚時方晏江湖客未歸定知吟憶處林外月光微



宛陵集卷五